

四庫全書

集部

欽定四庫全書

集部

重編瓊臺藁卷二十

詳校官監察御史臣范梈

中書臣劉源溥覆勘

總校官檢討臣何思鈞

校對官助教臣汪錫旌

謄錄監生臣錢宗孝

欽定四庫全書

重編瓊臺藁卷二十

明 邱濬 撰

傳

夏忠靖公傳

公諱原古字維詰其先會稽人徙饒之德興祖希政仕元為湖廣行省都事父時敏國初為湘陰教諭始家焉母夢三閭大夫入其室生公公生有異資年十三喪父

即刻志向學以詩經領鄉薦卒業太學選入內廷書制
誥擢任戶部主事大為尚書郁公新所委任會大朝覲
執政大臣劾諸司之怠事者有旨宥之郁堅請不已有
劉郎中者忌公因奏公主使郁太祖以問郁郁對曰臣
愚過聽堂後書算生罪甘萬死上意解宥之惟逮諸書
算生於獄劉計不行復以公專部事為言上察其奸并
誅劉三載秩滿吏部引陞見公跽面陳母老請歸省且
曰臣去家遠乏僕從乞寬其程限并暫假在官隸卒從

行上特允之人以為殊典是時公初為部屬已為上心所眷注如此三十一年陞本部右侍郎命充採訪使巡撫福建尋又出鎮蘄州太宗皇帝入正大統召還轉左侍郎踰月陞本部尚書上勵精圖治凡建文時教條政令有所更革者皆命公申明之凡三十餘事又明年蘇松諸郡大水奉命往治發浙西兵民數十萬疏決壅滯既而上命僉都御史俞士吉齎水利集往賜公俾講究拯治之法公乃集共事官屬濱河吏民及凡諳曉水利

之人博求參考以復奏謂嘉定之劉家港徑通大海常
熟之白茅港徑入大江是皆大川水流迅急之處宜浚
吳淞江南北兩岸安亭等浦港以引大湖諸水入劉家
白茅二港使之直注江海又松江大黃浦乃通吳淞要
道今下流壅塞難即疏浚傍有范家濱至南澹浦口可
徑達海宜浚令深濶上接大黃浦以達泖湖之水此即
禹貢三江入海之跡俟既開通相度地勢各置石牓以
時啟閉每歲水涸之時滌築圩岸以禦暴流如此事功

可成於民為便上從之公一一如所言而行水患乃息
又以其民久勞而飢奏發廩三十餘萬石以賑之躬行
督勸散給有方全活者甚衆永樂三年秋八月召回掌
部事上諭公曰向以部事付郁新而專委卿以浙西農
務庶內外克濟今新死付卿以部事卿其盡心毋怠公
首請裁冗食以省浮費量有無以均出入平賦役以甦
民困又言鹽法邊儲所係不許勢要開中以妨商賈錢
鈔國用所資不許富室專利以沮貿易以至禁包攬戒

侵欺清倉場廣屯種平價值皆請立定規以施諸天下
上嘉納之時承建文廢弛之後靖難之師方息府庫空
虛無有蓄積一時錫予功臣賞給士卒大封親藩增置
武衛添設百司而又召集天下儒生數百人於館閣編
輯大典未幾遣二十五將軍大興安南之役遣內官造
巨艦航西南大洋海以通西南諸番財用之費以億萬
計皆取給於戶部公晝夜焦勞經營綴葺惟恐拂上意
而殫民財時初建北京採宮殿材於西南命公暫行督

視自南京抵北京給以官校察其怠事者懲治之公即
榜諭軍民使其趨事懲一以戒百人人効用事濟而人
安行至德州有旨召公還且諭公曰行止卿自度之朕
不中定也七年春二月車駕巡幸北京命兼行在禮部
都察院事扈從歲餘上以北敵犯邊親帥六軍征之時
宣廟以皇太孫留守北京命公輔導兼行在六部都察
院大理寺事庶事修舉京師肅清上還大喜賜鈔幣鞍
馬冬十一月車駕還南京以從行勞賜休暇十日尋命

輔皇太孫周行鄉落以觀民俗繼命閱武於郊以知兵
事公所至隨事納忠多有裨益九年秋九月九載秩滿
上親宴之別殿降勅獎諭有循良篤實如古名臣之諭
并賜誥封祖父母十月上以太祖實錄建文時修多失
其實永樂初再修亦倉卒未備命史臣重修勅公與姚
少師廣孝監修未及成而姚公卒公獨專其事七年始
成上之十一年春二月扈從車駕巡北京十六年修天
下郡志命公提調十八年北京宮殿成奉勅召皇太子

皇太孫於南京既起行公先馳奏上命東宮宜緩行公見具傳上旨東宮曰君親雖有命臣子其敢緩乎公既至入見上問所以速來故公具述東宮言以對上悅公因言連年營造民疲轉輸逃亡者多今宮殿告成宜愛養民力凡各處流徙之民請悉宥之新復業者蠲所負詔行之十九年夏三殿災公上疏極言請寬民力蠲負貸使民心悅則天意可回上嘉納之是歲因災羣臣各言南北建都利便不同科道官因攻大臣上命面辯於

庭親御午門樓視之密命中使詢公孰是公曰臣等罪也科道言是上兩宥之或尤公背初議公曰不然天威嚴重吾輩歷事久言雖失幸上憐之若言官得罪所損不小衆皆嘆服冬十一月上以北蕃携貳命公與尚書方賓呂震吳中等議親征公等議宜且休養兵民未奏會獨召賓賓言今糧儲不足遂召公問糧儲多寡公對曰僅及將士之用耳不足以供大軍即命公往視開平兵儲吳中入對亦與賓同上怒急召公還賓聞懼自殺

公至命繫公於內官監籍其家惟得賜鈔千餘貫餘皆布衣瓦器而已明年正月車駕復北征出塞不見敵果以軍餉不足而還又明年上崩於榆木川仁宗皇帝即位即日復公官公以母喪未終辭仁宗勉留之曰國家不幸有大事正賴相與共濟艱難安得遽去卿云有喪我無喪乎如卿辭職朕亦不當在此公不復敢言賜賻禮遣官護其喪歸營葬事宣宗以皇太孫正位東宮加公太子少傅時呂震為太子少師班公右即進公少保

仍兼前職兼食三俸公固辭許辭太子少傅一俸同時
大臣當受誥命翰林呈草上取筆增二語曰勿謂崇高
而難入勿以有所從違而或怠且諭學士楊士奇等曰
此實朕心蓋望卿等匡輔之功也繼召公等至宸前賜
銀章一其文曰繩愆糾繆且諭曰朕有過舉卿即具奏
來以此誠之朕不難於從善也夏四月命兼掌禮部事
特賜象牙字印以便僉押其文曰正直蓋以旌公也又
以公有匡輔功賜第二區一在南京一在北京田五頃

仁宗賓天預聞顧命時宣宗為皇太子監國南京遺命
徵還嗣位時有漢庶人之疑中外洶洶羣臣欲出郊迎
太后命獨留公佐襄王留守京師輔臣郊見宣廟首問
公及蹇少師衆等不能對既至召公慰曰朕聞太后諭
知留卿意卿奉皇祖命輔朕有年非他人比卿當以所
事皇祖者事朕賜寶帶宣廟既嗣位公以舊輔倚毗尤
重宣德元年漢庶人反移檄誣輔臣奸邪亂政以公為
首盖以大臣中公最為列聖所委者故指以為兵端上

夜召公等入議公免冠謝曰臣不才致變親藩罪當死
上曰卿何為是言彼蓋假卿以興兵耳休戚與卿同之
命公坐密議屏左右語楊文敏公榮首勸上親征上難
之顧公公曰往事可鑒不可失也臣昨見命將而其色
變退語臣等而泣在廷如此則其臨事可知又曰兵事
貴速且有辭宜卷甲韜戈而往一鼓而平之所謂先人
有奪人之心也榮言是上意遂決即躬帥六師征之晝
夜兼程而往師臨城漢庶人懼欲降猶令人繞城上詈

公罪人既得大被恩賞賜公閤者三人掖公朝叅出入
公固辭曰舊制非勲臣不敢用上曰卿輔導忠勤非勲
而何乃拜賜是歲扈從車駕巡邊既還上以蹇公及公
等四人年老不欲煩以有司之政勅公曰卿等事祖宗
積效勤誠朕嗣統以來尤資贊輔夙夜在念圖善始終
蓋以卿等春秋高尚典劇司優老待賢禮非攸當況師
保之重寅亮為職不煩庶政乃副倚毗可輟部務朝夕
在朕左右相與討論至理共寧邦家其專精神審思慮

益致嘉猷用稱朕倚眷老成之意繼賜銀章一其文曰
含弘貞靜蓋以褒公德量云五年春兩朝實錄成賜宴
於中府明旦入謝既退得微疾命家人具湯沐浴正襟
端坐召其弟及子告之曰吾以一介書生叨居重任愧
無以報國家言訖而終時五年正月二十七日也享年
六十有五先二日有星墜庭之西南隅光燭地者久之
上聞訃震悼命有司製棺給賻營葬遣禮部尚書胡濙
諭祭贈特進光祿大夫太師謚忠靖官其子瑄為尚寶

司司丞仍復其家自公侯貴戚下至郎曹將校咸往祭
弔衛卒京民亦為流涕公性至孝少失怙母太夫人守
節公終父喪即出教里塾取束脩以資養及通朝籍每
出必候問起居公退非有客不離親側友愛諸弟其弟
有使酒者破其釀器家人奔告公笑曰弟又醉邪留二
俸在南京資其用度略不計平生與物無忤受人之惠
雖微必報少時曾受知於邑教史九韶既貴禮待如初
恒分俸以濟其乏與人交忘勢分篤親舊有無通共胡

祭酒僦屋以居公得賜第即以所居讓之胡致仕去就
驚以為臚谷庶人國於鄉郡有逆謀為蜀王所發上疑
郡人有預者公請以百口保之竟免究郭尚書敦使樂
安州為同事者所譖公力為救解遂得免其他如寬諸
城妖黨解表忠徹危疑不念呂宗伯宿憾皆世所謂陰
德大量者公心無適莫渾渾然不見圭角小人有所觸
犯虧損置之不問公平居無事坦坦如也一遇事明敏
奮發嘗奉命兼理諸司政務吏牘滿前迎見立解拔根

適節各得其宜商功計利惟恐有弊恒曰不可使後人
難為繼而戕吾民也其掌國計最久凡所建置區畫明
於闔閭斂散之術科分戶別有倫有要一一可為後法
歷事四聖隨事獻忠凡持論必歸仁厚存大體天下之
人陰受其賜者多矣一時大臣與公同功一體者惟蹇
忠定公時以蹇夏並稱然蹇公特以政事著稱於時而
公兼有文學之譽自開國以來三大纂修皆公為監修
所著有文集若干卷傳於世云論曰天開一代隆長之

治必其創造者有可祖之功而繼世者又得夫可宗之德也功立矣德修矣然非得夫股肱心膂之臣以贊助彌縫於其間亦曷能有以固其基成其治而綿其祚於有永哉公初入仕時即為太祖皇帝所知迨太宗入正大統首蒙拔擢繼事仁宣二朝始終四十餘年專掌國計其間雖或兼他官釐別務總理諸司之事與聞機密之政未始一日離計相之任也於乎大學治國平天下之要顯顯焉惟在理財用人夫治道亦多端矣聖門授

受皆不之及而獨舉理財以並於用人誠以用人為治
莫先焉財用既足天下事無不可為者矣列聖所以用
公之意盖有得於孔曾之傳也歟昔人論大臣以德量
氣節學術才能四者並言謂非兼是不足以當輔弼之
任觀公掌國計當內難始定之餘多事紛紜之秋國無
乏絕之憂民享和平之福非明於學術優於才能者其
能然乎況又一時大臣中稱有德量者以公為第一公
其無愧古人所謂大臣者哉

余肅敏公傳

公姓余氏諱子俊字士英眉之青神人也其先郢之京山人元末入蜀父祥仕為戶部郎中公生十歲而孤自幼有大志迥異常兒見者偉其不凡稍長從吳廉憲中受詩經中景泰辛未進士第授戶部江西司主事陞福建司員外郎在部屬中獨開敏精厲嘗有兩勢家爭田久未決部檄公理之其地名偶與所爭者姓同執為其家故產公曰然則張家灣盡張產耶卒為直之一時能

名聞諸上下部有難理事輒以委公天順庚辰出知西
安府府居會府下公務叢委訟謀紛紛三邊之事咸萃
於茲而使車過徃無虛日公處之裕如也在任六年治
行為關中七府之冠賜璽書旌異歲丙戌擢陝西右叅
政督三邊軍餉明年陞右布政使時有滿四之變用兵
所需取給有司公在軍中督屬趣辦罔有廢缺是役公
經畫之助為多庚寅轉浙江左布政使關中軍民惶惶
失所倚賴纔六閱月會西夏有警廷議以為公居陝久

民夷信服莫如用公遂拜公右副都御史巡撫延綏時
北敵入黃河套久屯不出朝廷屢遣文武重臣總制諸路
軍馬以備之公具疏言陝西有三邊延慶寧夏甘肅三
邊之中延慶於內地為近國初北敵遠遁黃河之外至
正統初始渡河來犯近邊建議者始請於沿邊地立界
石東西二千里於界石外開創榆林一帶營堡後累增
至二十四所延蔓千二百里屯軍積糧以扼入寇之路
又於營堡三十里外築墩臺以瞭望敵人闖境即舉煙

以示警用是邊境久寧天順以來敵知我東西諸邊各
據險以守難於窺伺惟延慶一帶地無險阻可以馳突
屢來犯邊掠我邊人以為嚮道遂知河套所在入屯其
中以伺機變自是敵顧居內而我列屯守圍反在其外
一入其中不得其出遂至遣將聚兵以為之備計以近
日用兵所費芻糧銀鈔以萬萬計今猶屯宿重兵未見
寧息將來供給又難計算臣愚以為莫若於沿邊一帶
墩臺空處築為邊牆增立砦堡雖非天險要為有據况

舊界石一帶多高山陡崖間有川口亦有限數乞勅沿邊府領各統戍卒及行附近布政司起倩民夫付臣統領依山形隨地勢或鏟削或壘築挑塹延引相接以為邊牆仍乞勅叅副遊擊等官領兵於界石之外下營架礮以為防蔽事下諸守將計議以為敵未出套未可庀工敵既出乃東起清水營之紫城砦西至寧夏之花馬池延蔓幾二千里每二三里間為對角敵臺崖砦連比不絕於其空處築堵者三橫一斜二如新月狀以偵敵

避射丸為堡十有二崖砦八百十有九小墩七十有八大墩十有五兩月之間厥功告成自是外寇稀矣初榆林列戍始於正統歲調延安綏德慶陽三衛官軍分戍而以河南陝右客兵班上助之未有衛也成化初議者嘗請於榆林堡立衛然未就緒至是公始請以先年陝右清出遠年不明軍籍及有罪責戍南土者之子孫免其遠戍就近編伍以實之且又拓其城比舊加廣凡軍中器用百爾具備率範銅鐵為之欸識以歲月又擇軍

中子弟之俊秀者為弟子員奏請建學立師以教之榆林俗不藝圃公求種於遠教民種植自是蔬果與內地等又於界石外開地以為屯田給軍民耕種得糧十數萬石以助經費自是榆林為重鎮而與寧夏甘肅鼎立而三矣敵自後經城下必嚙指相顧不敢鳴鏑向之癸巳公以功陞左副都御史又明年進右都御史仍鎮延綏公在延綏首尾六年說者謂榆林之鎮國初未有也有之始於正統然皆草創未備自時厥後鎮守巡撫者

非一人至公而後守禦之具始大備云丙申以本官移鎮關中有詔命議弭盜安民之策選將厲兵之方公乃條上事宜凡七一日衛國之計二曰保民之計三曰弭盜之計四曰安民之計五曰選將之計六曰守隘之計七曰善後之計其所建置皆關中軍民切要急務前人未舉者䟽入皆從之行之至今人以為便是秋入朝議事奏免岷河洮三衛之民戍南方者一萬有奇易置南北之更戍者六千有奇就以分戍固原之胡盧峽并魏

王城設平虜鎮戍二千戶所領之既歸鎮岷州四簇生羌作亂移兵平之獲首級四百岷地險隘自國初指揮馬燧深入其地至是再見於公羌人遠遁相戒曰馬帥復來矣誓不敢叛捷聞賜勅獎勵有北敵懾其威聲西戎遭其剽刼之褒初公在西安時患城中水多苦嫌民以為病宋時東引龍首渠水入城以利民汲其後湮塞成化二年又西引湔河之水自丈八頭起修石碑以啟閉樽節放水二分至西門十有五里貫城中以足民用

餘水洩出城積滯日多幾與城基等將至壞城公有意
欲修之未果至是乃議亦如丈八頭開新渠以洩餘水
經漢時故城以達於渭以免公私之患人至今便之號
為余公渠又涇陽縣舊有洪口堰山高水下不利灌溉
乃出公帑責健吏鑿山開道溉田千頃至今永為秦民
之利過者思焉丁酉召拜兵部尚書論前功加一品俸
逾年加太子太保賜金瑪瑙帶織金麒麟衣一襲丁內
艱服除即驛召改戶部尚書癸卯秋大同有警僉議邊

備久弛非公莫能振肅之乃命公節制沿邊諸軍事公請兵數萬分戍瓦剌入寇要路守將服公威望紀律一新瓦剌聞之引去尋召還甲辰以星變上言大要欲朝廷節財用而無浪費於土木禱祈重鹽法而無以實數作羨餘以賜權貴禁奪民利而不許貴倖乞閒田罷中官俾歸給役宮中而無預外事凡此皆人所難言者時論快之三月上以大同宣府乃國家藩屏雖有鎮守巡撫等官不足倚仗兵荒之後疲敝已極必得重臣庶其

有濟乃勅公總督兩處軍務自總兵以下咸聽節制公
即日出居庸歷宣府至雲中乃上疏言大同宣府兵民
疲敝誠如聖諭然舉事必先其急者今日事之最急當
舉者莫急於修邊牆臣向修於延綏已有成效乞以是
法推而行之宣府大同及偏頭關自東抵西一千三百
二十里各為墩六百一十今舊墩現有百七十擬新築
者四百四十每二里立墩臺一高三丈濶如之對角為
懸樓二空內挑壕塹濶丈五尺深殺濶之五計用五百

工十日可成一座以萬人十日計之可成二十座一月可成六十座兩月可成一百二十座以十人守之非但以瞭望而亦可以四面擊賊使賊不敢越每歲夏四月秋八月興工遇警即休事已復作暫借用軍民之力雖曰勞擾然而一成之後歲省邊費萬萬命下如公所奏行之既而宣府守將不遵約束公奏劾之而忌者因而造為飛語俄改左都御史專鎮大同忌者攬撫公行事命工部杜侍郎及科道官往按之案卷明白無有所私

乃止落太子太保以左都御史致仕家居未逾年復起
公典兵政比至屢疏以病乞休致不許悉復舊所兼官
未盡兩月憲宗皇帝賓天今上嗣位屢以疾求去不允
疾已亟猶命卧理部事屬楚蜀大荒公慮有變猶力疾
草疏乞遣將臣鎮壓之以消未然之患既封進屢問左
右章出未或曰否遂側身面內而卒時己酉二月二十
二日也享年六十有一上震悼輟朝一日遣官祭祭贈
光祿大夫太保賜謚肅敏公沉重簡默外若和緩內實

嚴毅自為部屬時事事不苟有一事不當輒熟思審處
之夜以繼日或對客猶沉吟未已或問之曰官中一二
事恐不當耳凡奏疏文移必自起草每夜至二鼓方寢
雖疾病中不廢天下事罔不經心而於國計邊務尤所
注意一生仕宦立朝之外皆在西北二邊而於關中尤
久故於榆林事為詳其功尤大而灼然在人耳目者在
修邊牆一事其後又以大同宣府切近京師依倣所已
行者為之竟為忌者所沮不克成論者謂其功程已有

次第假饒未為盡善但十得四五而亦享四五之利不
猶愈於盡廢乎論曰古稱儒臣之守邊者首稱韓范然
二公之事載諸史傳者議論居多鑿鑿乎見諸行事而
有實迹留於後世者亦不多見也今余公之建功在延
綏環慶之間蓋二公故壤也而榆林邊牆之修延袤餘
二千里敵人望望而去邊民優游以嬉者餘二十年矣
使繼公者人人皆體公心踵而葺之使毋至廢壞則公
之功留於後世者豈下二公哉夫天之於邊塞固限之

以山川山川不足而以人為補之因阨塞之闕順形勢之便以扼異類之衝突似不為過是故秦人築城非非而不量力不恤民則非也烏可以噓而廢食哉北魏高閭亦嘗建此議矣而不克遂而公則遂矣且有效矣而或者不廢其前功而顧逆料其後弊何哉忌之也亦非專為公也方公建議時有云凡事務須足到目過似能經久者方始為之予固知公非苟然而漫為之者邊牆之修成不成不足惜而所惜者民財民財不足惜而所

惜者國計嗚呼快一己之私而忘國計之大斯人何人哉

金侍郎傳

公諱紳字縉卿其先錢塘人洪武初以間右實京師遂為金陵人父潤號靜虛博雅好古工詩善畫為時輩所重公生而穎敏讀書數遍即成誦甫成童從石首汪弘初習進士業年二十以尚書蔡氏傳領京闈薦明年登進士第選入翰林為庶吉士會詔修天下地志公充纂修

官書成賜名寰字通志有白金綵綺之賜即拜刑科給事中明年英廟復辟懲景泰舊事屢召言官面授以名俾舉劾公時與焉或賜食嘗諭內閣學士李賢令吏部毋以補外一日晡時有詔言官劾大臣之非法者事出倉卒公援筆立成彈文辭理俱到明日當廷奏劾聞者駭服今上嗣位陞本科都給事中首率六科疏論錦衣衛指揮門達竊弄威福達坐謫戍邊天下快之初達以都指揮掌錦衣衛詔獄時達杲者專伺百官過失每

攢拾達達懼甚不敢恣及果被害達專委任以謝通為
心腹一切反果所為每事以忠厚為務時論翕然歸之
及通死達專聽其同官呂貴言以右武為事始任情張
威大興羅織遣官校遍行郡縣緝訪事情有犯者即遣
官屬拘逮所至賕賄狼籍天下騷然李學士以為言達
銜之屢欲中傷賴先帝仁明而止至是詐寃者紛然公
時掌刑科奮然謂其僚曰此天下之大蠹言官責也此
而不言又何用六科為即攘臂草奏當朝劾之時天順

甲申也尋陳時政八事上以其言有理詔曰前三事朕自行之後五事付所司集議三事者持恒久勤接見納忠言也三言者皆當時要務而勤接見一言尤為切中蓋祖宗以來於凡燕閒之際執政大臣及左右近侍時常皆得接見自先帝以幼冲嗣位而此禮遂廢因襲以為故事故言及之歲丙戌漕河淤阻京師米價騰踊沿河盜起公建遣御史及帥臣緝捕遂得安妥是歲陞南京大理少卿時公年纔踰三十屬官深於法者意公

於法比容有所未習姑以難事試之公剖決無滯雖老
於法者不過是乃大敬服尤留心獄事恒曰獄者人死
生所繫繁楚之下何求不得彼不能伸於法司而求伸
於我我又不為之理何用理寺為故凡經公平允者輒
無異辭公在大理九年如一日秩滿陞南京刑部右侍
郎月躬視獄者再每戒飭其屬俾無法外施刑故事霜
降後會大臣審錄重囚必先召所屬郎署反覆詳審有
可矜疑者必具錄之至期對衆言某事可疑某情可矜

因因而得生者甚衆戊戌江西荒歉上特簡任公往巡視許以便宜行事公委藩臬二司定計授畫俾各蒞所部督責其屬勸興發而自居會府之行臺不輕舉動蓋以專徃一方而他方有事則有所不及濟凡可以寬民力裕民食節財用弭盜賊者無所不用其心在江西幾年凡措置得白金以兩計者十有七萬米穀以石計者幾二十萬所活軍民以口計者毋慮百六七十萬江西十有三郡之民賴公以安庚子回任又明年壬寅六

月辛酉偶得疾越六日丙辰卒年四十有九公性簡靜而慎交游且官故鄉故舊有以私謁者輒拒絕之始雖不樂終莫不信服其公侍靜虛翁家居者幾二十年不以公務而廢其私家之孝養時人榮之平生儉約一無所好惟好積書號心雪所著有心雪稿若干卷存於家子三人長麒壽庚子貢士次麒永麒寧論曰公生長京師有靜虛翁為之父年甫弱冠即登甲第選入中秘讀人間未見書即與纂修地志之命書成授官近侍擢貳

大理繼二秋官殆其歿也又有葬祭之恩年雖僅及父
然人世百年所不能得者而皆有之於乎是固其世積
家教之素學問持守之功而亦遭遇其時歟同年登進
士者三百五十人選讀書中祕者二十一人公年最少
發達最早仕不出其鄉而父母俱存兄弟無故一登仕
籍即蹈亨途未嘗一日齟齬而又推恩上封其祖下廕
其子而長子者又以世業登天府名歷官二十有九年
凡五轉官階所至有聲而人無異議公之死可謂無憾

矣年雖不甚長而名之在天地間者則昭昭乎長不朽矣

毛宗吉傳

毛君諱吉字宗吉餘姚人也性剛直尤嫉惡自在邑校時見鄉人顯宦者歸或挾勢以凌鄉曲而於郡之長吏則卑卑以希合輒毅然形見顏面曰我得志弗為也歲甲子中鄉試再試禮部皆乙科不屑就歲甲戌登進士第授刑部廣東清吏司主事故事十三清吏司分理在

京諸司刑獄廣東司當錦衣衛衛卒伺察百官陰事攬
撫得分寸書片楮以聞不復核虛實輒當以罪公卿大
臣皆惴惴奉承之惟謹公行請託莫敢違拒甚至以罪
被逮法司亦不加筭君在清吏司有逮至者一懲以法
略無顧忌其人至以俚語目君曰毛葛刺時長衛者怙
寵大肆羅織勢焰燦人百官遇諸途趨避惟恐後君遇
之獨以一手舉鞭彼愕然顧左右曰此非刑部毛葛刺
耶益銜之其徒百計求君短長訖不可得適君偶以疾

誤朝叅命錦衣衛鞫之其黨走報其長曰毛葛刺來矣
乃預簡卒之彊忍者掄巨杖待君君至僅榜四支五骨
見矣衆意君必死適有僧同在繫見君創甚而無悲容
苦曲事君得不死既而隨衆例得復職衆咸曰毛葛刺
自此懲創改節矣及蒞職操法愈嚴未幾陞廣東按察
司僉事時廣城以西流賊殺掠居民殆盡其東幸無事
而豪宗大戶武斷吞併積習成俗君分巡惠潮首知其
弊痛懲之豪右斂迹及其當代二郡民赴巡撫大臣願

再借君一年於是檄再往先是程鄉民羅劉寧者作亂
官軍平之其黨楊輝者逖往贛之安遠招集餘衆於閩
廣江西之交大肆標掠時官軍皆征廣西君不得已招
之而輝等從命復業比君還會府而輝等復起標掠如
故君再至賊勢益大輝據上下寶龍峒其黨曾玉等據
石坑峒謝瑩據龍歸峒破江西之安遠福建之上杭二
縣遠近騷然謀報賊期以十一月二十二日攻程鄉縣
治君曰賊勢衆矣與其臨時拒敵孰若先事制之乃命

縣長吏密集民壯并召旁近官軍僅得七百人即日倍道行三百里至赤硃坑翌日又行三十里至石坑峒賊數人負米出峒衆欲奮擊之君曰舍之母驚動賊衆少頃賊知官軍至以其衆三千人陳山下賊衆我寡士卒有懼色君躬擐甲胄督戰於是士卒爭奮自辰至午戰數十合賊遂敗走生擒曾玉及其徒二十餘人斬首三百餘級乘勝破龍歸峒獲謝瑩又明日直擣下寶龍輝衆陳石崖上我軍陳水中相持守之君以戰不得地亟



分兵繞出其後賊莫測遂驚潰前後擒斬一千四百餘人餘黨悉平是役也我士卒不損一人犒賞糧餉皆出於臨時調度不取於官不斂於民又獲白金三千餘兩悉以送官巡撫大臣以其功狀聞未報而君又當分巡雷廉高三郡人民為賊所殺虜十七八道路蕪塞數百里間無煙火君攬轡四顧慨然以削平賊寇為已任既抵所部城門晝閉郡守猶鞭繫城中殘民追徵不已君至首命止之百姓如獲更生分守都指揮等官嬰城擁

兵賊或十餘人或三五十人驅脇子女以千百數口過城下不肯出一騎發一矢甚或燕飲酣歌若罔聞知吏民以賊告輒加箠楚有自賊中逃回者輒誣以通賊杖殺之自是生民進退失據無復生路矣君至嘆曰此方之人獨何辜哉是雖一時守將之責抑亦督責者之過也時雷州海康知縣王麒者獨奮不顧為衆所嫉君獨獎勵之適報賊至大體等村君時在雷州即移文都指揮出軍擊賊彼畏縮不敢出君又以大義激之亦不從

君即督麒領民壯躬抵賊所戰敗之斬首數百餘級奪
回被虜人畜無數賊分三支犯吳川縣君覘知其一近
河道即命麒乘小舟出賊不意悉破之得首虜六十餘
級其二支聞風遯去自是君所部稍寧君以平賊方略
來上上嘉其勞內批陞君本司副使仍降勅獎諭委以
一方邊務而麒亦陞本府通判勅至君益感激思報歲
乙酉春正月賊東出惠之河源轉掠韶之翁源君率官
軍二千兼程追之斬獲百餘級賊遂西奔三月新會告

急君率都指揮焦用指揮孫壁等官軍三千人至新會
又得民之自効者近萬人明日行至大磴與賊遇戰破
之獲首二十餘級乘勝追至雲岫山去賊營十餘里時
二鼓矣君號召諸將曰賊營後山箐而前畝田左右皆
山隴若敗必遁入後山爾等明日分兩哨進據後山我
以精銳衝其中爾兩哨左右合擊之賊可盡圖也約以
鷄鳴蓐食黎明進兵是夜無星月遂至後期不得已三
哨齊進賊果敗走棄營携妻子上後山君命潘百戶者

帥精壯千人據賊營賊多遺財物軍士競取之賊據高
瞭軍士有爭奪者遂擁衆馳下刺殺潘軍士皆自營門
擁出賊自後追之與右哨指揮閻華遇力戰久之君命
某往援某承命不赴華馬蹶亦為賊所刺諸哨遂奔潰
君勒馬持刀大呼曰劄駐劄駐衆以潰勢不可復君從
吏廖振等勸君宜隨衆姑避之以圖再舉君曰吾誓不
與此賊俱生今衆多被殺傷而我獨生全可乎汝等亟
走勿顧我言未已賊七八人持鎗趨君君且罵且敵猶

手劒斬賊斷一人臂力支不能遂被害時三月一日也是日雷雨大作山谷皆震動連日陰晦又八日始得君屍面貌如生舁歸廣城官吏士民弔哭者相屬事聞贈君通奉大夫廣東按察使錄其子科為國子生是時仕嶺南與君同志者惟麒一人麒字某雲南大理府人正統丁卯貢士由胄監擢知海康縣至官日以忠義激其民遇賊至輒率衆奮擊之前後多所殺獲雷人賴以少安而一時郡守邊將反惡之君奏其有守有為同日陞

本府通判未被命而先君死於賊至是有司併以開朝
命與贈君者同日下贈麒麟奉議大夫雷州府同知死時
年四十四麒年若干史濬曰初君死時或傳至京師言
藩司以白金千兩充行軍犒賞費委驛丞余文者從公
行以司出入已用十之三矣文憫君死而貧無以為歸
費以所餘金七百兩密授君僕持歸是夜僕之婦忽出
中堂據正席舉止如公狀顧左右曰請夏憲長來舉家
驚惶走告近居沈經歷沈報僉憲胡希仁急來視之瞪

目視胡曰非也頃之夏至乃起揖而言曰某受國恩不幸死於賊固無餘憾但余文所遺官銀已付某家雖官府無所稽考而某負污辱於地下矣願亟以還官毋污我言畢婦忽仆地少頃始蘇竟不知其所以云予始聞此言不敢以語人及夏君來覲予詢之果然嗟乎君生而廉勁不頗既死而英爽不昧猶如此而世之便已自文者至或誣君以激變蟻君以賊私是尚有人心哉是尚有人心哉

孔侍郎傳

公諱鏞字韶文姓孔氏宣聖五十八代孫也元季高祖
克信始自曲阜遊學江西阻兵不歸而居蘄州父友諒
舉進士知蜀之雙流縣公幼孤好學甫弱冠為長洲縣
學生時提學孫御史鼎教人務先德行學置一籍名敦
本首著公名於籍公用是奮發益力於學登甲戌進士
第初知都昌分民戶為九等以均賦役設倉於水次以
便收斂縣濱彭蠡每風雨波濤澎湃若有物蜿蜒其中

舟多覆者相傳以為纜精過者望而祀之偶歲大旱公
往驗之乃巨木歲久為荇藻所絡若鱗介然公火之其
妄遂絕尋以弟銘選尚寧府郡主例避嫌改廣之連山
連山西連昭賀猺獞出沒無寧歲公至縣治無廨宇可
居俸給殆絕父老間有至者公詢知民所在遣人招之
不來公親詣其地民見公至驚走既而公炊飯民舍輒
留錢米以償其薪水之費乃相率還拜伏道左公一一
賑恤之俾復業由是趨事縣中縣治始復踰年大兵征

廣西巡撫葉都御史檄公率民丁隨軍征勦公所至招徠不事斬艾賊聞風降附諸將有欲殺人取馘者公必力爭之全活者甚衆時廣東州郡之界廣西者無不殘破而高州尤甚僉謂公有撫綏才薦公試知府事高州城外四山皆賊壘僅餘孤城城外積屍如京觀民外死於賊內死於疫城中軍民不滿百公至首呼父老問計咸曰城中人多有賊之戚屬切宜防之其來趨城者其心不可保惟宜閉門固守公曰不然高州本無賊而賊之

來也皆自廣西往時守土者無遠圖民携家屬十百里
來投城將以求生也乃閉門不納以致為賊所藎醢其
在城中者又疑之或加害焉用是衆心携貳致外攻而
內應往時城陷正坐此也乃大開城門來者無不納而
在城者相染成疫曲加撫摩調養死者為義塚於城外
以瘞之流聞風來歸日以百數城不能容公即城東
北隅築土為城以居焉時賊屯高化境者凡十餘鄧公
長據茂名之茅峒馮曉屯化州之西北界梁定屯雷禾

嶺鄧辛酉屯於游魚寨侯大六屯於信宜界皆劇盜也
惟茅峒距城僅十里而公長尤黠驚公屢遣人撫諭之
使退不從公不告之僚屬不謀之妻子黎明潛呼四疲
卒肩輿出城徑抵賊巢公長見太守至倉皇不知所以
亟呼其黨掇甲出迓恠公無騎從遣人遠偵回報無所
見乃釋甲羅拜請公入坐定公從容諭以逆順禍福指
天定約公長意猶豫而衆首感悟泣下恨公來晚公長
跪奉卮酒為壽公飲之不疑衆齊喊舞約降護送公回

夜四鼓遠近見火起賊自焚其巢也黎明開門納降者得數千人公長既降諸賊聞風次第納款馮曉久屯化州界結土民以為內應久招之不服公詒以備他盜整兵夜進遣部下蒙浩率敢死士二百餘截其後而公以前軍應之二鼓擣其巢曉遁去執其妻子以歸曉意必戮其妻子也官軍屢招之不出既而聞公存撫甚厚也遂以其黨五百來歸事聞有文綺寶鏐之賜特陞廣東按察司副使賜璽書褒獎俾仍守其地於是梁定侯大

六鄧辛酉皆受公招撫處之內地分地與耕且為我備
他盜公部下有黎浩林雄數人皆有謀勇而雄尤為拳
捷後死於賊公撫尸慟哭親為殯葬一軍莫不感泣用
是民夷感畏所至成功高州人懷公德惠立生祠祀之
公聞母喪還守制軍民泣送有出千里外者服闋改官
廣西諸州猺獞聞公名有素相率遠遁未幾陞按察司
賊起自荔浦來寇總督朱都憲屬公督軍勦之賊相顧
愕然曰此高州公憲副耶是不可敵也亟趨去公一鼓

平之事聞進階食二品祿賜文綺寶鏐尋陞左布政使
莅事甫半月陞右副都御史巡撫貴州賜勅許便宜行
事公益殫心力清平都勻二衛苗人據險肆掠垂二十
年公至適來為患公督諸將授以方畧次第勦平邊徼
無事公釐革諸弊奏請以貴州囚徒之戍雲南者撥補
本處沿途驛遞軍夫之缺而給與月糧增設布政司官
一員以專督糧餉皆前所未有也其他如省冗費黜貪
殘減抑軍官之僭從卒反寃獄諸事皆足以厭服人心

公清心介行所至人望而愛之知其為厚德君子也故
言出而人信之事行而人無異議今上初即位公上章
言歷任三十餘年無一任不在邊方冒觸瘴毒積濕成
疾乞致仕上不允既而念公久勞於外陞工部右侍郎
召還道浙河而卒于富陽舟中弘治己酉九月三日也
享年六十有三訃聞遣官諭祭命有司營葬事論曰吾
夫子有言吾欲居九夷又曰道不行乘桴浮於海解者
謂夫子特寓言耳豈真欲浮洪濤而居瘴癘之鄉耶孰

意其真極之後二千餘年而其聞孫乃真以其却菜兵
墮三都之術而施之桂海鬼方之間耶公以神明之曹
誦詩學禮乃其素業也况軍旅之事聖祖猶以為未學
而不欲以施之齊衛之地而又遑及於聲教漸被之遐
外乎雖然儒者之道大而無所不通王者無戲言况聖
人而虛言耶吾知聖人所謂未學蓋謂春秋之世所從
事者爾唐虞三代所謂神武不殺所以戡禍亂致太平
者庸有不學乎王者一視同仁無間遐邇所謂浮海居

夷真誠有是言必真誠有是事特時無其事耳設或遇
有其事未必不實踐其言也歷考史傳孔氏子孫顯者
不過數人光不足道也安國穎達輩皆以經術著名求
其以功名顯於中州者固少而又況從事干戈以施之
遐外之域乎哉尤其鮮也入國朝來孔氏子孫仕而官
至卿佐者僅公一人足以為聖門之光矣朝廷以聖人
之經術取人而得聖人之子孫而能實用聖人之言以
成聖人千載已沒之志豈但光孔氏哉誠亦儒者之光

也予與公同科進士情誼視他人為篤且生嶺海間知
公事特詳故為之傳云

學拙先生傳

天下日趨於巧矣所為拙者世絕少萬有一人焉似拙
矣而實寓至巧於其中學拙先生生而拙者也顧以學
稱此其異於人而予有以取之也學拙先生者姓蕭氏
名旺字應韶其先廬陵人也元末有起義保鄉井者國
初編入戶籍遷戍廣東之惠州今居惠三世矣先生質

實無他腸矢口出言無所避忌凡所云為皆誠心直道
未嘗委曲遷就或目之曰拙先生笑曰予豈能拙哉學
拙者耳大書宋周濂溪拙賦於壁日三復焉一出言一
動足退輒惴然懼且憂曰吾得無過於巧乎人因其然
遂名之以學拙先生而先生亦欣然曰稱吾者甚宜故
亦以自號焉先生少無宦情隱然居戎伍中而名動一
方自郡將以下咸敬重之僉舉為社學師其教人也甚
有次第一時子弟經其指教者咸徐言緩步人望之知

其為先生弟子也先生平生善行可稱者甚多而事師恤鄰二事尤為惠人所稱道鄉儒有黃東野者工於詩先生自幼師事之其人既老貧且無子先生事之不啻所生日供其飲饌歲給其衣服九衾枕幃幔器用無不備焉既死斂襲殯葬之具一一如禮又為之服心喪者三年鄰人有徐姓者遭疫癘死者十餘口闔室出避其祖母老且病不能行雖至親者慮其傳染過而不之顧先生朝夕其旁躬具饘粥食之至死又為之斂殯云其

平生所為大率類此二事皆世之號為能巧者所不屑為者也先生歿時年僅四十八平生止一子曰青字庭翠由進士起家為南京禮部祠祭清吏司主事今陞郎中朝廷以庭翠貴贈先生如其子官君子曰先生非拙者也拙於取利而巧於取善拙於得人而巧於得天先生非拙生非拙者也雖然取善遲取利速得人易得天難舍其速且易者而為其遲與難先生豈非拙者哉先生歿十有九年矣世之巧者日益其求拙如先生者何可得哉

何可得哉

無逸子傳

無逸子者句容人凌其姓潭其名也字曰永澄先世以勤起家至無逸子五世矣千指同爨世守一勤至無逸子其勤益甚恒謂人曰我家之勤亦猶張氏之忍也彼以忍而相容我以勤而相勵茲其所以能久歟無逸子晝自旦至夕歲自春徂冬生自嬰至耄未嘗少逸愛之者曰子家衣食幸有餘貲且多子姓童僕胡自苦若是

無逸子曰吾求逸爾未達曰人惟無逸所以終逸彼常
逸者豈得逸哉觀之天天未嘗一息停也故能成夫物
觀之水水未嘗一息舍也故能底於海人何獨不然人
特懵然於其中而不自覺耳盍觀嬰兒乎方見其出胞
胎也既而可襁負也又繼而可提步也俄而髻且齟矣
突而角且弁矣天所以生生長長之者曷嘗息乎彼其
身不自覺也終日與之處者不之覺也久別而忽相覩
者則驚且訝之矣由是而推之若動物若植物莫不皆

然是孰使之然哉造物者所以生生長長之化其機未嘗一息息也天之於我未嘗一息息我何可自暴自棄而苟安怠惰以自逸哉彼遊方之外者曰大塊息我以死蓋知此矣人苟未至於結纓易箠之際皆非可息之境也一息尚存此志不容少懈非但欲勤己以成德業也天道如是而人理亦當然爾吾之所以無逸我者蓋求以息我也無逸而至於息我之境報天地以生成我之恩還天地以生動我之機斯可以長逸矣吾之所謂

無逸者蓋如是世豈人人知我哉因以無逸子自號人亦以無逸子稱之太史氏曰或有人傳無逸子言至京師予聞之驚且駭焉曰茲豈今世人哉茲豈今人言哉恨未之能一見也有一儒生謁予於所居詢其姓名乃無逸子子衍也因質其詳生告予以乃父所以謂其無逸者亦皆平平日用之常無甚過人者蓋自其幼而弱弱而壯而強而艾而耆今且老矣為子而奉其父母若伯叔父母為弟若兄而友其弟若兄若羣從兄弟與夫

處族姻友朋故舊一皆無悖德無違禮治家殖產樹藝
字畜事事皆不廢時亦不違時凡其所行皆與人同但
人不能常而無逸子則常常如是耳噫資近乎道而自
然存諸心行諸身施諸人者不詭異而有其常此無逸
子所以合於聖人中庸之道也歟是以傳之以表見於
世

錄

定興忠烈王平定交南錄

太宗文皇帝入正大統之初安南國王陳日烜為其臣
黎季犛所弑季犛詭姓名為胡一元子蒼為胡奎矯稱
陳氏絕嗣奎其甥請權署國事上不逆其詐從其請未
幾求襲王爵許之踰年陳氏孫天平始從老嫗遁至京
想其實季犛聞之懼遣使上表請迎天平還以國永樂
四年春遣使者以兵五十人送天平歸達其境季犛伏
兵殺之及使者上聞之震怒諭羣臣曰朕為萬國主奎
爾蠻夷乃敢為不道以戕其主奪其國朕不正其罪如

天道何既而占城亦告其侵軼疆界強授以印服又聞其僭號大虞紀年號蒼偽稱尊號季犛稱太上皇毀中國儒教謂孟子為盜儒程朱為剽竊乃議興兵問罪羣臣咸贊成之乃遣大臣告於郊廟分遣近侍徧告天下山川秋七月癸未制諭太子太傅成國公朱能佩征夷大將軍印充總兵官西平侯沐晟為征夷左副將軍新城侯張輔為征夷右副將軍豐城侯李彬為左叅將雲陽伯陳旭為右叅將勅大將軍率右副將軍右叅將又

清遠伯朱友領驃騎將軍朱榮劉剡出鷹揚將軍呂毅
方政神機將軍程寬羅文游擊將軍朱廣王恕橫海將
軍魯麟劉清等二十五將軍統兩京畿荆湖閩浙廣東
西之軍從廣西思明府憑祥縣進左副將軍率左叅將
領都指揮陳濬盧旺等統巴蜀建昌雲貴之軍從雲南
臨安府蒙自縣進以兵部尚書劉儁贊戎機刑部尚書
黃福大理寺卿陳洽給事中馮貴督餽餉於凡所過名
山大川修祀事乙酉出師上親幸龍江禡祭將帥陪位

受服維謹訖事駐驛江潯誓於衆曰朕命汝等奉行天
罰罪惟元兇尚體朕心毋窮武毋殺降毋繫累老稚毋
毀壞室墓雖一草一木亦勿妄剪除違朕命者雖勞弗
勩且底於罰能等頓首受命萬衆鼓舞登舟以行是年
九月師次龍州大將軍邁疾以師授右副將軍十月庚
子大將軍薨衆議軍機事重不容以緩請右副將軍代
總其兵行大將軍事急驛以聞上命輔就佩征夷大將
軍印代能總兵且降勅諭之曰昔太祖皇帝命開平王

常遇春為大將軍岐陽王李文忠為偏將軍率師北征
開平王卒於柳河川岐陽王率諸將掃蕩殘寇終建大
勲著名青史爾宜取法前人以建萬世之功此定興忠
烈王受命專征之始先是王與大將軍榜示黎賊父子
大罪二十以明天討之意數季犛兩殺其主以奪其國
罪一凡陳氏子孫殺之殆盡罪二淫刑以逞視國人如
讐重斂暴征民不聊生罪三世本黎氏背祖更姓罪四
既篡主位乃詐稱權署國事以罔朝廷罪五表請陳氏

孫還以國及朝命使送之乃敢拒遏罪六殺國主孫罪
七侵雲南之寧遠州七寨罪八殺土官猛慢虜其女徵
其銀罪九威逼近邊土官致其駭散罪十侵廣西之祿
州地界罪十一擅據酉平州殺土官罪十二占城國王
占巴的賴國新遭喪興兵攻其舊州格烈等地罪十三
又攻板達郎黑白等州掠其人民罪十四勒取占城象
百餘仍加兵不已罪十五占城既受天朝章服輒偽造
金印帶服逼使其受罪十六責占城王惟知尊重中國

而欲其以所以事中國者事之罪十七朝使送占城陪
臣還其國以兵劫之於毘陵巷口罪十八既奉正朔又
僭稱國號偽紀聖元紹成開大年號罪十九朝貢不至
陪臣輒以罪人充使罪二十初交人聞天兵南下罔知
所以既聞榜示咸知其曲在彼及見榜末云待黎賊父
子就擒之後選求陳氏立之莫不延頸跂足以待王師
之至王以十月丁未至憑祥縣禡牙入境并望祀其國
中山川畢諭於衆曰皇帝非利安南土地人民乃為黎

賊害其國主虐其黎庶奉行天討以繼絕世甦民困命
我等以弔民伐罪丁寧告戒非臨陣不得殺人非稟令
不許取物毋掠子女毋焚廬舍毋踐禾稼爾等宜奉承
聖天子意以立奇功不用命者必以軍法從事無赦衆
皆歡呼用命是日大軍入坡壘開揭前榜諭國中吏民
以朝廷伐罪弔民之意以招徠之王詢知坡壘以南由
隘留關歷鷄陵關至芹站山菁深險林木陰翳且多溪
澗慮賊有伏先遣鷹揚將軍呂毅哨探及檄都督同知

韓觀營於坡壘修道路繕橋梁督糧運戍申大軍次丘
溫縣已酉哨至隘留關賊衆二萬依山結寨毅攻拔之
斬首四十級生擒六十餘人是日驃騎將軍朱榮等亦
破鷄陵關斬首六十餘級生擒十一人賊聞二關破其
屯兵設伏者悉奔散壬子大軍次鷄陵關癸丑次芹站
是日先遣鷹揚將軍方政游擊將軍王恕等直抵富良
江北岸嘉林縣是時左副將軍西平侯亦自雲南蒙自
縣進兵經野蒲蠻入境都指揮朱濬等奮猛烈關俞讓

等拔柵華隘隨處築堡駐兵伐木造船都指揮徐源孔
斌等突出宣光江口奪其澳泐等沙左叅將豐城侯領
兵渡其上游都督程達等中夜舁舟越山自間道以出
逃水江縱火焚賊舟遂奪富良江十一月乙巳西平侯
統軍至三帶州與王所遣都督朱榮會癸酉橫海將軍
魯麟驃騎將軍劉劄出拔困吾寨是日有偽三帶州僉
判鄧原南策州人莫遠等來降因詢降人知賊窠穴在
東西二都恃宣江沱江富良江以為險自三江府沱江

南岸繖圓山起由富良江南岸東下直至寧江又自富良江北岸自海潮江由希江麻牢江直至盤灘因拔山立木為柵及增築土城於多邦隘樹柵立城連橋接艦七百餘里又於富良江南岸緣江下木杙悉國中舟艦泊其內允諸港汊可通舟處俱下巨木以備賊衆聚屯守水陸者號七百萬蓋悉驅國中老幼婦女以助聲勢非實然也大軍屯富良江北岸王以書諭季聲曰予奉命統兵來問爾罪爾能戰則率衆於嘉林以待不能戰

赴軍門以聽處分王意欲挑其急戰也會朝遣行人朱
勸賫勅至諭聲賊以禍福及許其輸金五萬兩象百隻
以贖罪行人至其國季聲不出見以詭辭畲曰文書比
對原發勘合不同此必非上所遣又云兵已入境若兵
面即貢否則自有準備王知此勅是欲以款其兵而賊
亦無改過悔罪之意乃移軍三帶州屯箇招市口與左
副將軍西平侯會議造船置銃以圖進取時賊有划船
出沒江口王命魯麟夜舁舟從上游下水奪其船斬首

百餘級自是划船不敢出沒王與西平侯議於上流渡江乃遣朱榮等於下流十八里嘉林置舟筏為欲渡之勢以掣其勢賊果分遣水軍於嘉林奪我舟榮等奮擊大破之十二月己亥大軍與左副軍合勢王與西平議曰賊邊江立柵勢逼地狹難以列軍惟多邦臨城外沙灘上平關足以容軍然其城峻濠深守具無不備而外設坑坎布竹籤賊所恃者此耳蠻人綿薄不耐苦不足慮也令我攻棋若雲梯仙人洞之類俱備攻而取之易

也乃召將士諭之曰汝等報國成功在此一舉宜奮勇
爭先以立奇功先登者不次陞賞將士聞命無不踴躍
乃議分地界大軍攻其西南左副軍攻其東南已酉各
列軍沙灘之上布置已定別調軍距欲襲之處里許作
欲攻之勢以出賊不意於是出內府所製夜明光火藥
散軍士俾執之有先登者燃之及吹角為號是夜四鼓
都督黃中率官軍潛舁攻具越重濠抵城下用雲梯先
附城都指揮蔡福等數人先躡梯登用刀亂斫賊衆驚

呼城上火齊明角應之士皆蟻附而上賊于城內列陣
驅象來衝我軍乃出內府所製獅子皮蒙馬象見獅形
驚畏而顫又為銃箭所傷倒回奔突賊潰亂自相蹂踐
及官軍殺死者不可勝計大軍乘勝長驅明日追至緄
圓山又明日循富良江南岸而下縱火焚緣江一帶木
柵煙焰張天辛亥直擣其東都克之王與左副將軍駐
軍於城之東南給榜招諭吏民降者日以數萬計王召
其父老諭以弔伐之意歡聲動地乙卯議遣左叅將豐

城侯李彬右叅將雲陽伯陳旭伐其西都賊首聞多邦
破先已焚其倉廩携妻子遁於海島我軍至焚其宮室
據其城池餘黨依天建山困救山等處水陸據守乃分
遣清遠伯王友都督黃中都指揮柳琮等隨賊所在而
征勦之自是年冬至明年春前後斬首三萬七千餘級
時王留交州鎮過聞賊子黎澄聚舟黃江左副將軍左
叅將領軍循富良江左右水陸並進次於木九江對岸
下營辛巳賊船三百餘艘來犯我軍水陸夾擊賊衆大

敗斬首萬餘級溺死者無算二月乙巳王聞賊首遁於
悶海口出魯江口與左副將軍會兵下膠水縣賊聞大
軍至又遠遁大安海口王謂左副將軍曰賊聞大軍來
不敢敵故潛遁他所以覘我動靜我若回軍交州留兵
於鹹水關兩岸留戰船守備彼必出悶海口以襲我我
俟其出水陸併擊之賊必成擒三月癸酉大軍回交州
甲午賊果犯鹹水關報至乙酉王與左副將軍兵水陸
並進賊以海船橫絕海口而以戰船划船兩岸齊進既

而登岸植木為柵王乘其柵之未成親督精銳攻之都督柳昇等亦率舟師來奮擊賊遂大敗富良江水為之赤積屍數十里右叅將雲陽伯乘勢長驅直抵閩海口黎賊父子聞敗乘船遠遁於靈源王諭諸將宜乘破竹之勢追勦殄滅乃回軍交州留右叅將守鎮備禦黃江等處四月乙亥王與左副將軍統軍由清化府倍道兼進調柳昇魯麟土官莫遂等分領戰船由水路窮追戊寅舟師至清化之磊江賊衆聚船以拒昇等擊敗之斬首萬

餘級五月丁卯王至濱州柳昇等舟師來會途中降者
相繼訶知黎賊父子遁于又安府之深江王議與左副
將軍兵從陸路柳昇等率舟師由水路追賊壬申大軍
至又安府土油縣王從舉厥江東路左副將軍從舉厥
江西路進兵兩軍俱至盤石縣下營甲戌柳昇率舟師
至奇羅海口與賊戰大敗之獲賊船三百艘餘船分散
賊首潛竄草野乙亥昇所領軍士王柴胡等七人擒賊
偽上皇黎季犛黃中所領軍士李保保等十人獲偽衛

國大王黎澄丙子莫邃下土人武如卿五人獲偽國主
黎蒼及其偽太子蒔於高望山九黎氏親屬俘獲無遺
安南地悉平所得府州四十八縣一百八十六戶三百
十二萬五百象馬牛羊舟糧器械無算遣都督柳昇等
獻俘闕下露布以聞先是王等受命時詔令求陳氏子
孫立之至是平定王徧訪國中官吏耆老人等咸稱黎
賊於己卯年殺光泰王顥立其子韶而殺之遂篡其國
前後殺其近屬五十餘人及其遠族又千餘人血屬盡

絕無可繼立者請依漢唐故事立郡縣如內地以復古
王疏以聞上從其請乃於其地立交趾等處承宣布政
使司都指揮使司按察司分其地為十七府四十七州
一百五十七縣據其要害設衛十一守禦千戶所三又
於交廣分界處如潼關衛例設立溫衛及坡壘隘留二
守禦所軍隸廣西民屬交趾以相制馭是歲大詔天下
以平安南復古郡縣之故并勅有司為陳王贈謚凡其
宗親為賊所害者各贈以官又為之建祠立碑葺墳墓

禁樵採各給戶三十畝賊苛政暴斂悉皆除之擢用
賢能優禮耆老賑恤窮獨革去夷俗以復華風使秦漢
以來之土宇陷於徼外者四百四十六年一旦復入中
國版圖詔布天下文武羣臣親王藩服咸上表稱賀六
年春班師入朝秋七月策功行賞進封王英國公西平
侯黔國公清遠伯王友進侯爵都督柳昇陞安遠伯餘
擢官增祿有差賜王誥券玉帶金帛命子孫世襲加祿
米三千石既大宴上親製平安南歌以褒嘉之是年冬

安南餘孽簡定作亂定自稱陳姓本前陳舊官先已降附既而遁於乂安府與其黨鄧悉鄧鎔阮帥陳希葛等謀反偽稱日南王既而僭號大越稱興慶年號朝命黔國公充征夷將軍從雲南往征之久不能遏絕廷議謂非王不可七年正月乃命王佩征虜副將軍印往共勦之王以四月至南寧會兵五月入境王躬督戰艦破孔目柵再破賊子關斬俘無數賊退保黃江乘勝擊之於太平海口賊竄乂安偈江冬十月師至清化越四日生擒


簡定於吉利柵之山并其黨陳希葛等輜送京師明年
二月王還朝上嘉勞之未幾簡定餘黨陳季擴復嘯聚
僭稱重光年號季擴乃簡定從子簡定為阮帥等所廢
而立季擴定敗潛遠竄聞王班師復與陳景異等同反
九年春正月復授王前印往督師征之夏五月師次東
關六月進兵賊聞王至以石填神頭海口三十丈許設
拒木以抗王督將士悉起其石以通舟楫賊懼立堡常
月江王戒衆曰此堡不足攻其山南險阻彼必設伏以

撓我乃使驍將率土兵搜山果得其伏者斬之遂奪其
堡賊遂遠遁王隨所至而追之賊或聚或散竟莫得其
要領時關以東羣盜峰起所完者交州一城耳蓋新設
州縣軍衛太多交人久外聲教樂歡縱不堪官吏將卒
之擾徃徃思其舊俗一聞賊起相扇以動賊首所至輒
為之供億隱蔽以故賊潰復聚朝廷屢下詔招撫之授
李擴以布政使彼欲受命制於其黨服而復叛偽稱王
孫以復陳氏為辭大軍至則深入山海避之軍退復出

用是官軍不能成功王既蒞軍始大明賞罰而諸將疲
於奔走往往因循玩寇都督黃中不用命王以軍法從
事由是人民知懼不敢辭難避險是時賊恃荷花海險
謂我師不能渡於日麗海口立堡以守王率舟師自奇
羅海口洋過荷花海口直抵日麗賊焚堡而遁至茶偈
江連進兵破之賊驚曰天兵飛來也遂大潰奪其化日
城諜知賊悉衆守愛子江復追至其境賊伏巨象數十
以為前敵列人馬於後盡力以抗我師王戒將校曰擒

賊在此一舉機不可失乃鞭馬先進象伏突起王一箭落其象奴再箭中其象鼻象叫號退走自蹂其衆乘勢擊之斬艾僵伏填滿山澗賊徒散遁暹蠻等處王部分將領隨處搜捕至暹蠻昆蒲等柵山徑崎嶇林麓陰翳馬不能前王乃下馬徒步履險兼程趨之士卒不能從惟將校百餘人僅屬與賊遇殺數千人賊首陳季擴暨其妻子皆就擒時十一年冬也明年班師還京自王出師至是首尾踰三年始獲首虜說者謂王此役較之前

平定之功為難云十三年四月朝命王佩征夷將軍印
充總兵官往鎮交趾又有平陳月胡之功十五年上以
王久勞於外詔還京師王以正統己巳沒於王事至是
三十有七年矣嗣子太子太傅襲封英國公懋出其家
閭者歷任所錄王平安南時前後所上奏啟見示屬予
次第之予因參考交趾郡志所載露布榜文及胡文穆
公奉勅作平安南碑楊文貞公撰東平武烈王及定遠
忠敬王神道碑附以所聞以為此錄云



重編瓊臺業卷二十